

/վարչական վարույթը վերսկսելու և վարչական տույժ նշանակելու մասին/

«09» մարտի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Իրանի Իսլամական Հանրապետության քաղաքացի Էսմաեիլ Գոլմոհամմադի Նամազի Յամիի (T56377543, հասցե՝ ԻԻՀ, ք.Մարանդ, գ.Փայամ) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

2022 թվականի դեկտեմբերի 12-ին ՀՀ ՊԵԿ ՄԴՊՎ ՍՏԲ Մեղրիի բաժանմունքի և ՀՄՎ Մեղրիի մաքսային կետ-բաժնի աշխատակիցները համատեղ Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, ԻԻՀ քաղաքացի Էսմաեիլ Գոլմոհամմադի Նամազի Յամիի կողմից շահագործվող «INTERNATIONAL» մականիշի, 43A343/43A344 պետհամարանիշի կիսակցորդով բեռնատարը, ինչի արդյունքում, նշված բեռնատարի վարորդի խցիկի քնատեղի ներքնակի տակից հայտնաբերվել է մաքսային հսկողությունից թաքցված 9 հատ շագանակագույն, 10 հատ մուգ կապույտ գույնի, ընդհանուր 14.5 կգ քաշով կաշի:

Փաստի առթիվ 12.12.2022 թվականին ՀՀ ՊԵԿ ՄԴՊՎ ՍՏԲ Մեղրիի բաժանմունքի ավագ մաքսային տեսուչի կողմից «Մաքսային կարգավորման մասին» ՀՀ օրենքի 313-րդ հոդվածի հատկանիշներով հարուցվել է վարչական վարույթ:

Վարչական վարույթի շրջանակներում մաքսային հսկողությունից թաքցված կաշիների շուկայական արժեքները պարզելու նպատակով 14.12.2022 թվականին նշանակվել է ապրանքագիտական փորձաքննություն, որի կատարումը, հիմք ընդունելով ՀՀ ՊԵԿ-ի և ՀՀ ԱՆ «Փորձագիտական կենտրոն» ՊՈԱԿ-ի միջև առկա պայմանագիրը, հանձնարարվել է «Փորձագիտական կենտրոն» ՊՈԱԿ-ին:

Ղեկավարվելով «Վարչարարության հիմունքների և վարչական վարույթի մասին» ՀՀ օրենքի 47-րդ հոդվածի 1-ին մասի բ) ենթակետով և 4-րդ մասով 10.02.2023 թվականին վարչական վարույթը երկարաձգվել է մինչև փորձագետի եզրակացության տրամադրումը:

ԱՆ «Փորձագիտական կենտրոն» ՊՈԱԿ-ի եզրակացության համաձայն՝ վերոնշյալ կաշիները հանդիսանում են ջայլամի թռչնի մշակված կաշվի հատվածամասեր՝ բորդո և կապույտ գույների:

Վարչական վարույթի շրջանակներում ԻԻՀ քաղաքացի Էսմանիլ Գոլմոհամմադի Նամազի Յամիի կողմից մաքսային հսկողությունից թաքցնելու եղանակով ՀՀ մաքսային սահմանով տեղափոխված ապրանքների մաքսային արժեքները, վճարման ենթակա մաքսային վճարների չափերը և ոչ սակագնային կարգավորման միջոցների կիրառելիությունը պարզելու նպատակով՝ թիվ 47 մտից համարի զեկուցագրով հարցում է կատարվել ՀՀ ՊԵԿ Հարավային մաքսատուն-վարչության համապատասխան ստորաբաժանմանը:

ՀՀ ՊԵԿ Հարավային մաքսատուն-վարչության մաքսային գործառնությունների բաժնի թիվ 64 մտից համարի տեղեկանքի համաձայն՝ 2022թ դեկտեմբերի 12-ի դրությամբ 9 հատ բորդո գույնի մշակված ջայլամի կաշվի մաքսային արժեքը կկազմեր **315000 ՀՀ դրամ**, իսկ 10 հատ կապույտ գույնի ջայլամի կաշվի մաքսային արժեքը կկազմեր **300000 ՀՀ դրամ**, նույն տեղեկանքի համաձայն այս ապրանքների նկատմամբ ոչ սակագնային կարգավորման միջոցներ կիրառելի չեն:

«ԵՏՄ մաքսային օրենսգրքի» 2-րդ հոդվածի 1-ին մասի 25-րդ ենթակետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով

տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ «Հայաստանի Հանրապետության պետական սահմանով մաքսային հսկողության ներքո գտնվող ապրանքների տեղափոխումը՝ մաքսային հսկողությունից թաքցնելով՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանք՝ **այդ ապրանքների մաքսային արժեքի հիսուն տոկոսի չափով, բայց ոչ պակաս, քան մեկ միլիոն դրամի չափով**»:

Ի՞հ հՀ քաղաքացի Էսմաել Գոլմոհամմադի Նամազի Յամիին Իրանի Իսլամական Հանրապետություն, ք.Մարանդ, գ.Փայամ հասցեին ուղարկվել է գործի քննության վերաբերյալ ծանուցագիր, սակայն հետադարձ ծանուցումը կամ չստացված ծրարը փոստային ծառայության կողմից հետ չի վերադարձվել:

«Հայփոստ» ՓԲԸ-ի պաշտոնական կայքէջի /<https://www.haypost.am/>/ ուսումնասիրությունից պարզվել է, որ Ի՞հ քաղաքացի Էսմաել Գոլմոհամմադի Նամազի Յամին այս գործի քննության օրվա, ժամի և վայրի մասին չի ծանուցվել:

Ի՞հ քաղաքացի Էսմաել Գոլմոհամմադի Նամազի Յամիի ՀՀ-ի հասցեն պարզելու նպատակով՝ հարցում է կատարվել ՀՀ Ոստիկանության անձնագրային և վիզաների վարչությանը:

Ի պատասխան հարցման ՀՀ Ոստիկանության անձնագրային և վիզաների վարչությունը տրամադրել է տեղեկատվություն առ այն, որ քաղաքացի Էսմաել Գոլմոհամմադի Նամազի Յամիի հաշվառման վայրի վերաբերյալ տվյալներ առկա չէ:

Քաղաքացի Էսմաել Գոլմոհամմադի Նամազի Յամիի սահմանահատումների պատմությունը ստանալու նպատակով՝ 07.03.2023 թվականին հարցում է կատարվել ՀՀ ՊԵԿ Ներքին անվտանգության վարչությանը:

Ի պատասխան հարցման ՀՀ ՊԵԿ Ներքին անվտանգության վարչությունը տրամադրել է սահմանահատումների վերաբերյալ տեղեկատվություն՝ համաձայն որի քաղաքացի

Էսմանիլ Գոլմոհամմադի Նամազի Յամին 30.12.2022 թվականին ժամը 00:09-ին Ազարակ պետական սահմանի անցման կետով անցել է ԻԻՀ:

«Մաքսային կարգավորման մասին» ՀՀ օրենքի 332-րդ հոդվածի համաձայն համաձայն՝ «Մաքսային կանոնների խախտումների վերաբերյալ գործը քննվում է պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ Հայաստանի Հանրապետության օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ:

Մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության պետական սահմաններից դուրս»:

Հիմք ընդունելով և ղեկավարվելով «Մաքսային կարգավորման մասին» ՀՀ օրենքի 313-րդ, 322-րդ, 332-րդ հոդվածներով և 334-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Իրանի Իսլամական Հանրապետության քաղաքացի Էսմանիլ Գոլմոհամմադի Նամազի Յամին «Մաքսային կարգավորման մասին» ՀՀ օրենքի 313-րդ հոդվածով սահմանված մաքսային կանոնների խախտում կատարելու համար ենթարկել վարչական պատասխանատվության՝ տուգանել **1 000 000 ՀՀ դրամ**:

2. Որոշման մասին հայտնել քաղաքացի Էսմանիլ Գոլմոհամմադի Նամազի Յամինին:

3. «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից:

4. «Մաքսային կարգավորման մասին» ՀՀ օրենքի 334-րդ հոդվածի 4-րդ մասի համաձայն Վարչական տույժ նշանակելու մասին մաքսային մարմինների որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով որոշումը ուժի մեջ մտնելու օրվանից՝ երկու ամսվա ընթացքում:

Սույն որոշմամբ նշանակված տուգանքի վճարման հաշվեհամարն է. **900005024055՝ 1 000 000 ՀՀ դրամ /մեկ միլիոն դրամ/, նշել 30 կողմ:**

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ